

EAST ASIAN LIBRARY
RM 8049 ROBARTS LIBRARY
UNIVERSITY OF TORONTO
TORONTO, CANADA M5S 1A5

漢魏六朝百三家集

魏

第二十八冊

嵇中散
鍾司徒

✓ 28

贊

原憲贊

原憲味道、財寡、義豐、栖遲華門、安賤固窮、絃歌自樂、體逸心冲、進應子貢、邈有清風、

襄城童贊

水經注云黃帝嘗遇牧童於襄城之野故嵇叔夜贊曰

奇矣難測、襄城小童、倦遊六合、來憇茲邦、

司馬相如贊

長卿慢世、越禮自放、犢鼻居市、不恥其狀、託疾避官、蔑此卿相、乃賦大人、超然莫尚、

許由贊

許由養神。宅于箕阿。德貞體全。擇日登遐。

井丹贊

井丹高潔。不慕榮貴。抗節五王。不交非類。顯譏輦車。左右失氣。披褐長揖。義陵群萃。

琴贊

惟彼雅器。載璞靈山。體其德真。清和自然。澡以春雪。澹若洞泉。溫乎其仁。玉潤外鮮。

箴

太師箴

浩浩太素、陽曜陰凝、二儀陶化、人倫肇興、厥初
冥昧、不慮不營、欲以物開、患以事成、犯機觸害、
智不救生、宗長歸仁、自然之情、故君道自然、必
託賢明、茫茫在昔、罔或不宣、赫胥既往、紹以皇
羲、默靜無文、太朴未虧、萬物熙熙、不天不離、爰
及唐虞、猶篤其緒、體資易簡、應天順矩、絺褐其
裳、土木其宇、物或失性、懼若在手、疇咨熙載、終

禪舜禹夫統之者勞仰之者逸至人重身棄而不恤故子州稱疲石戶乘桴許由鞠躬辭長九州先王仁愛愍世憂時哀萬物之將頽然後蒞之下逮德衰大道沉淪智慧日用漸私其親懼物乖離

肇仁利巧愈競繁禮屢陳刑教爭

施天性喪真李世陵遲繼體承資憑尊恃勢不友不師宰割天下以奉其私故君位益侈臣路生心竭智謀國不吝灰沉賞罰雖存莫勸莫禁若乃驕盈肆志阻兵擅權矜威縱虐禍蒙邱山

刑本懲暴。今以脅賢。昔爲天下。今爲一身。下疾
其上。君猜其臣。喪亂弘多。國乃殞顛。故殷辛不
道。首綴素旗。周朝敗度。彘人是謀。楚靈極暴。乾
谿潰叛。晉厲殘虐。樂書作難。王父棄禮。穀胎不
宰。秦皇荼毒。禍流四海。是以亡國繼踵。今古相
承。醜彼摧滅。而襲其亡徵。初安若山。後敗如崩。
臨刃振鋒。悔何所增。故居帝王者。無曰我尊。慢
爾德音。無曰我疆。肆于驕淫。棄彼佞倖。納此逆
顏。諛言順耳。染德生患。悠悠庶類。我控我告。唯

秘中散集

卷全

全

賢是授。何必親戚。順乃造好。民實胥效。治亂之
原。豈無昌教。穆穆天子。思聞其懿。虚心導人。允
求讜言。師臣司訓。敢告在前。

誠

家誠

人無志非人也。但君子用心。所欲準行。自當量其善者。必擬議而後動。若志之所之。則口與心誓。守死無二。耻躬不逮。期於必濟。若心疲體懈。或牽於外物。或累於內欲。不堪近患。不忍小情。則議於去就。議於去就。則二心交爭。二心交爭。則向所見役之情勝矣。或有中道而廢。或有不成一簣而敗之。以守則不固。以之攻則怯弱。與

之誓則多違。與之謀則善泄。臨樂則肆情。處逸則極意。故雖繁華熠熠。無結秀之勲。終年之勤。無一旦之功。斯君子所以歎息也。若夫申胥之長吟。夷齊之全潔。展季之執信。蘇武之守節。可謂固矣。故以無心守之。安而體之。若自然也。乃是守志之盛者可耳。所居長吏。但宜敬之而已矣。不當極親密。不宜數徃徃。當有時。其衆人又不當宿留。所以然者。長吏喜問外事。或時發舉。則怨。或者謂人所說。無以自免也。若行寡言。慎。

備自守則怨責之路解矣。其立身當清遠。若有
煩辱。欲人之盡命。託人之請求。當謙辭遜謝。其
素不預此輩事。當相亮耳。若有怨急。心所不忍。
可外違拒密爲濟之。所以然者。上遠宜適之。幾
中絕常人淫輩之求。下全束修無玷之稱。此又
秉志之一隅也。凡行事先自審其可不差於宜。
宜行此事而人欲易之。當說宜易之理。若使彼
語殊佳者。勿羞折遂非也。若其理不足。而更以
情求來。守人雖復云云。當堅執所守。此又秉志

之一隅也。不須行小小束修之意氣。若見窮乏而有可以賑濟者。便見義而作。若人從我。欲有所求。先自思省。若有所損廢。多於今日所濟之義少。則當權其輕重而拒之。雖復守辱不已。猶當絕之。然大率人之告求。皆彼無我有。故來求我。此爲與之多也。自不如此而爲輕竭。不忍面言。彊副小情。未爲有志也。夫言語君子之機。機動物。應則是非之形著矣。故不可不慎。若於意不善了。而本意欲言。則當懼有不了之失。且權

忍之。後視向不言此事。無他不可。則向言或有不可。然則能不言全得其可矣。且俗人傳吉遲傳凶疾。又好議人之過闕。此常人之議也。坐言所言。自非高議。但是動靜消息。小小異同。但當高視。不足和答也。非義不言。詳靜敬道。豈非寡悔之謂。人有相與變爭。未知得失所在。慎勿預也。且默以觀之。其非行自可見。或有小是不足是。小非不足非。至竟可不言以待之。就有人問者。猶當辭以不解。近論議亦然。若會酒坐。見人

爭語其形勢似欲轉盛便當亟舍去之此將鬪之兆也坐視必見曲直黨不能不有言有言必是在一人其不是者方自謂爲直則謂曲我者有私於彼便怨惡之情生矣或便獲悖辱之言正坐視之大見是非而爭不了則仁而無武於義無可當遠之也然大都爭訟者小人耳正復有是非共濟汗漫難勝可足稱哉就不得遠取醉爲佳若意中偶有所諱而彼必欲知者若守大不已或劫以鄙情不可憚此小輩而爲所攬

引以盡其言。今正堅語不知不識。方爲有志耳。
自非知舊鄰比。庶幾已下。欲請呼者。當辭以他。
故。勿往也。外榮華則少欲。自非至急。終無求欲。
上美也。不須作小小卑恭。當大謙裕。不須作小。
小。廉耻當全。大讓若臨朝讓官。臨義讓生。若孔。
文舉求代兄死。此忠臣烈士之節。凡人自有公。
私。慎勿強知人。知彼知我。知之則有忌於我。今。
知而不言。則便是不知矣。若見竊語私議。便舍。
起。勿使忌人也。或時逼迫強與我共說。若其言。

邪險則當正色以道義正之。何者君子不容僞薄之言故也。一旦事敗便言某甲皆知吾事以宜備之深也。凡人私語無所不有宜預以爲意。見之而走者何哉。或偶知其私事與同則可。不同則彼恐事泄思害人以滅迹也。非意所欽者而來戲調蚩笑人之闕者但莫應從。小其轉至於不共而勿大冰矜趨以不言答之勢不得久行自止也。自非所監臨相與無他宜適有壺榼之意求修之好此人道所通不須逆也。過此以

往自非通穆匹之饋車服之贈當深絕之何
者常人皆薄義重利今以自竭者必有爲而
作鬻貨徵歡施而求報其俗人之所甘願而君
予之所大惡也

闕

又憤不須離

樓強勸人酒不飲自巳若人來勸巳輒當爲持
之勿謂勿逆也見醉薰薰便止慎不當至困醉
不能自裁也

秘中散集

卷全

并

樂府

詩品云頗似魏文。過爲峻切。訐直露才。傷淵雅之致。然託論清遠。良有鑒裁。亦未失高流矣。詩譜云人品胸次高。自然流出。藝苑卮言云詩少涉矜持。更不如嗣宗。

秋胡行七首

富貴尊榮。憂患諒獨多。富貴尊榮。憂患諒獨多。古人所懼。豐屋蔀家。人害其上。獸惡網羅。惟有貧賤。可以無他。歌以言之。富貴憂患多。

其二

貧賤易居。貴盛難爲工。貧賤易居。貴盛難爲工。

耻佞直言。與禍相逢。變故萬端。俾吉作凶。思牽
黃犬。其計莫從。歌以言之。貴盛難爲工。其計莫
作其莫
之從

其三

勞謙寡悔。忠信可久安。勞謙寡悔。忠信可久安。
天道害盈。好勝者殘。彊梁致災。多事招禍。患欲
得安樂。獨有無愆。歌以言之。忠信可久安。害一
作惡

一無事字
愆集作憊

其四

役神者弊。極欲疾枯。役神者弊。極欲疾枯。顏回
短折。不及立。鳥縱體淫恣。莫不蚤徂。酒色何物。
今自不辜。以言之。酒色令人枯。

其五

絕智弃學。遊心於玄默。絕智弃學。遊心於玄默。
遇過而悔。當不自得。垂釣一壑。所樂一國。被髮
行歌。和者四基。歌以言之。遊心於玄默。

其六

思與王喬。乘雲遊八極。思與王喬。乘雲遊八極。

嵇中散集

卷全

空

凌厲五岳、忽行萬億、授我神藥、自生羽翼、呼吸
太和、鍊形易色、歌以言之、思行遊八極

其七

徘徊鍾山、息駕於層城、徘徊鍾山、息駕於層城、
上蔭華蓋、下采若英、受道王母、遂升紫庭、逍遙
天衢、千載長生、歌以言之、徘徊於層城

詩

幽憤詩

晉書云東平呂安服康高致康友
獄辭相證引遂復收康康謹言行。一旦
縲絏乃作幽憤詩。按鍾會有憾於康時
呂安兄與姦通安妻與爲大將軍長史
遂構誣將害安鍾會爲大將軍所善因
勸大將軍誅康康又有與呂長悌絕交
書甚詳其間曰阿都開悟每喜足下有
此弟足下許吾不擊都以子父六人爲
誓吾乃感足下重言慰解都都遂釋然
何意足下包藏禍心密表擊都今都獲
罪吾爲負之吾之負都繇足下之負吾
也蓋康嘗爲安致解於其兄兄給其和
密致其罪康悔固爲是書與其兄絕交
遂牽連入獄幽憤之詩正志其事所以
有內負宿心外面良朋之語魏氏春秋

謂呂與誣其弟安不孝。安引康爲證。康義不負心。保明其事。向子期思舊賦序云。余少與嵇康。呂安居止接近。其人並有不羈之才。然嵇意遠而疎。呂心曠而放。其終各以事見法。

嗟余薄祐。少遭不造。哀榮靡識。越在絳綬。母兄鞠育。有慈無威。恃愛肆姐。不訓不師。爰及冠帶。憑寵自放。抗心希古。任其所尚。託好老莊。賤物貴身。志在守樸。養素全真。曰余不敏。好善聞人。子玉之敗。屢增惟塵。大人含弘。藏垢懷耻。民之多僻。政不繇已。惟此褊心。顯明臧否。感悟思愆。

恒若創痛。欲寡其過。謗議沸騰。性不傷物。頻致
怨憎。昔慙柳惠。今愧孫登。內負宿心。外慙良朋。
仰慕嚴鄭。樂道閒居。與世無營。神氣晏如。咨予
不淑。嬰累多虞。匪降自天。實繇頑疎。理弊患結。
卒致囹圄。對答鄙訊。繫此幽阻。實耻訟冤。時不
我與。雖曰義直。神辱志沮。澡身滄浪。豈云能補。
嗷嗷鳴鴈。奮翼北遊。順時而動。得意忘憂。嗟我
憤歎。曾莫能儔。事與願違。遘茲淹留。窮達有命。
亦又何求。古人有言。善莫近名。奉時恭默。咎悔

不生萬石周慎。安親保榮。世務紛紜。祇攪予情。
安樂必誠。乃終利貞。煌煌靈芝。一年三秀。予獨
何爲。有志不就。懲難思復。心焉內疚。庶勗將來。
無馨無臭。采薇山阿。散髮巖岫。永嘯長吟。願性
養壽。寬善作免

襍詩

微風清扇。雲氣四除。皎皎亮月。麗于高隅。興命
公子。携手同車。龍驥翼翼。揚鑣踟蹰。肅肅宵征。
造我友廬。光燈吐輝。華幔長舒。鸞觴酌醴。神鼎

烹魚絃超子野，歎過綿駒流。詠太素，俯讚玄虛。
孰克英賢，與爾剖符。

贈秀才八軍十九首

集云：兄秀才公穆入軍，贈詩。張銑注云：叔

夜弟

鴛鴦于飛，肅肅其羽。朝遊高原，夕宿蘭渚。邕邕
和鳴，顧眄儔侶。俛仰慷慨，優游容與。

其二

鴛鴦于飛，嘯侶命儔。朝遊高原，夕宿中洲。交頸
振翼，容與清流。咀嚼蘭蕙，俛仰優游。

其三

泳彼長川，言息其滸。陟彼高岡，言刈其楚。嗟我
征邁，獨行踽踽。仰彼凱風，涕泣如雨。

其四

泳彼長川，言息其汜。陟彼高岡，言刈其杞。嗟我
獨征，靡瞻靡恃。仰彼凱風，載坐載起。

其五

穆穆惠風，扇彼輕塵。奕奕素波，轉此遊鱗。伊我
之勞，有懷佳人。寤言永思，實鍾所親。

其六

所親安在。舍我遠邁。弃此蓀芷。襲彼蕭艾。雖曰幽深。豈無顛沛。言念君子。不遐有害。

其七

人生壽促。天地長久。百年之期。孰云其壽。思欲登仙。以濟不朽。攬轡踟躕。仰顧我友。

其八

我友焉之。隔茲山岡。誰謂河廣。一葦可航。徒恨永離。逝彼路長。瞻仰弗及。徙倚彷徨。

其九

良馬旣閑，麗服有暉。左攬繁弱，右接忘歸。風馳
電逝，躡景追飛。凌厲中原，顧盼生姿。

其十

携我好仇，載我輕車。南凌長阜，北厲清渠。仰落
驚鴻，俯引淵魚。盤于游田，其樂只且。

其十一

凌高遠眄，俯仰咨嗟。怨彼幽繫，邈爾路遐。雖有
好音，誰與清歌。雖有姝顏，誰與發華。仰訊高雲，

俯託輕波、乘流遠遁、抱恨山阿、

其十二

輕車迅邁、息彼長林、春木載榮、布葉垂陰、習習
谷風、吹我素琴、交交黃鳥、顧儔弄音、感悟馳情、
思我所欽、心之憂矣、永嘯長吟、

悟集
作寤

其十三

浩浩洪流、帶我邦畿、萋萋綠林、奮榮揚暉、魚龍
澶澌、山鳥群飛、駕言出遊、日夕忘歸、思我良朋、
如渴如飢、願言不獲、愴矣其悲、

其十四

息徒蘭圃，秣馬華山。流磻平臯，垂綸長川。目送
歸鴻，十揮五絃。俯仰自得，游心太玄。嘉彼釣叟，
得魚忘筌。郢人逝矣，誰與盡言。

其十五

閒夜肅清，朗月照軒。微風動桂，組帳高褰。旨酒
盈樽，莫與交歡。鳴琴在御，誰與鼓彈。仰慕同趣，
其馨若蘭。佳人不在，能不永歎。

其十六

乘風高遊，遠登靈邱。託好松喬，攜手俱遊。朝發太華，夕宿神州。彈琴詠詩，聊以忘憂。

其十七

琴詩自樂，遠遊可珍。含道獨往，弃智遺身。寂乎無累，何求於人。長寄靈岳，怡志養神。

其十八

流俗難悟，逐物不還。至人遠鑒，歸之自然。萬物爲一，四海同宅。與彼共之，予何所惜。生若浮寄，暫見忽終。世故紛紜，弃之八成。澤雉雖飢，不願

園林安能服御。勞形苦心。身貴名賤。榮辱何在。
貴得肆志。縱心無悔。

其十九

雙鸞匿景曜。戢翼太山崖。抗首漱朝露。晞陽振
羽儀。長鳴戲雲中。時下息蘭池。自謂絕塵埃。終
始永不虧。何意世多艱。虞人來我疑。雲網塞四
區。高羅正參差。奮迅勢不便。六翮無所施。隱姿
就長纓。卒爲時所羈。單雄翻孤逝。哀吟傷生離。
徘徊戀儔侶。慷慨高山陂。鳥盡良弓藏。謀極身

心危。吉凶雖在已。世路多嶮巇。安得反初服。抱
玉寶六奇。逍遙遊太清。攜手長相隨。

酒會詩七首

淡淡流水淪胥而逝。汎汎綠舟。載浮載滯。微嘯
清風。鼓楫容裔。放櫂投竿。優游卒歲。

其二

婉彼鴛鴦。戢翼而遊。俯唼柏藻。託身洪流。朝翔
素瀨。夕棲靈洲。搖蕩清波。與之沈浮。

其三

流詠蘭池、和聲激朗、操縵清商、遊心大象、傾昧
修身、惠音遺響、鍾期不存、我志誰賞、

其四

斂絃散思、遊釣九淵、重流千仞、或餌者懸、猗與
莊老、棲遲永年、實惟龍化、蕩志浩然

其五

蕭蕭苓風、分生江湄、邕昔華林、俯泝丹坻、含陽
吐英、履霜不衰、嗟我殊觀、百卉具腓、心之憂矣

孰識玄機

坻一作奇

其六

猗猗蘭、藹、殖、彼、中、原、綠、葉、幽、茂、麗、葢、濃、繁、馥、馥、
惠、芳、順、風、而、宣、將、御、椒、房、吐、薰、龍、軒、瞻、彼、秋、草、
悵、矣、惟、騫、

其七

樂、哉、苑、中、遊、周、覽、無、窮、已、百、卉、吐、芳、華、崇、基、邈、
高、跼、林、木、紛、交、錯、立、池、戲、魴、鯉、輕、九、斿、翔、禽、織、
綸、出、鱸、鮪、坐、中、發、美、讚、異、氣、同、音、軌、臨、川、獻、清、
酤、微、歌、發、皓、齒、素、琴、揮、雅、操、清、聲、隨、風、起、斯、會、

豈不樂，恨無東野子。酒中念幽人，守故彌終始。
但當體七絃，寄心在知己。

答二郭三首

天下悠悠者，下京趨上京。二郭懷不群，超然來
北征。樂道託萊廬，雅志無所營。良時邁其願，遂
結歡愛情。君子義是親，恩好篤平生。寡志自生
災，屢使衆釁成。豫子匿梁側，聶政變其形。顧此
懷怛惕，慮在苟自立。今當寄他域，嚴駕不得停。
本圖終宴婉，今更不克并。二子贈嘉詩，馥如幽

蘭馨戀土思所親不知氣憤盈

子一作讓

其二

昔蒙父兄祚少得離負荷因疏遂成懶寢跡北
山阿但願養性命終已靡有他良辰不我期當
年值紛華坎壈趣世務常恐嬰網羅義農邈已
遠拊膺獨咨嗟朔戒貴尚容漁父好揚波雖逸
亦已難非余心所嘉豈若翔區外餐瓊漱朝霞
遺物弃鄙累逍遙遊太和結友集靈岳彈琴登
清歌有能從此者古人豈足多

其三

詳觀凌世務，屯險多憂慮。施報更相市，大道匿
不舒。夷路值枳棘，安步將焉如。權智相傾奪，名
位不可居。鸞鳳避爵羅，遠託崑崙墟。莊周悼靈
龜，越穆嗟王輿。至人存諸已，隱璞樂玄虛。功名
何足殉，乃欲列簡書。所好亮若茲，楊氏歎交衢。
去去從所志，致謝道不俱。

穆一作稷

與阮德如

含哀還舊廬，感切傷心肝。良時遘數子，談慰臭

如蘭疇昔恨不早。旣面侔舊歡。不悟卒永離。念
隔增憂歎。事故無一有。別易會良難。郢人忽已
逝。匠石寢不言。澤雉窮野草。靈龜樂泥蟠。榮名
穢人身。高位多災患。未若捐外累。肆志養浩然。
顏氏希有虞。隰子慕黃軒。涓彭獨何人。唯志在
所安。漸漬殉近欲。一往不可攀。生生在豫積。勿
以怵自寬。南土旱不涼。衿計宜早完。君其愛德
素。行路慎風寒。自力致所懷。臨文情辛酸。
累拾遺作

慮

遊仙詩

遙望山上松、隆谷鬱青蔥、自遇一何高、獨立迴
無雙、願想遊其下、蹊路絕不通、王喬弃我去、藥
雲駕六龍、飄飄戲玄圃、黃老路相逢、授我自然
道、曠若發童蒙、採藥鍾山隅、服食改姿容、蟬蛻
弃穢累、結友家板桐、臨觴奏九韶、雅歌何邕邕
長與俗人別、誰能覩其蹤

述志詩二首

潛龍育神軀、濯鱗戲蘭池、延頸慕大庭、寢足俟

皇義慶雲未垂景盤桓朝陽陂悠悠非吾匹疇
肯應俗宜殊類難徧周鄙議紛流離輶軻丁悔
吝雅志不得施耕耨感甯越馬席激張儀逝將
離群侶杖策追洪崖焦鵬振六翮羅者安所羈
浮遊太清中更求新相知比翼翔雲漢飲露餐
瓊枝多念世間人夙駕咸驅馳冲靜得自然榮
華安足爲

其二

斥鷃擅蒿林仰笑神鳳飛坎井螭蛭宅神龜安

所歸恨自用身拙。任意多永思。遠實與世殊。義
譽非所希。往事既已謬。來者猶可追。何爲人事
間。自令心不夷。慷慨思古人。夢想見容輝。願與
知己遇。舒憤啟其微。巖穴多隱逸。輕舉求吾師
晨登箕山巔。日夕不知飢。立居養營魄。千載長

自綏

飛一作姿箕
拾遺作西

惟上古堯舜

二人功德齊均。不以天下私親。高尚簡樸。茲順

甯濟四海烝民。

唐虞世道治

萬國穆親無事，賢愚各自得志，晏然逸豫，內忘佳哉，爾時可喜。

知慧用

爲法滋章，寇生紛然，相召不停，大人玄寂，無聲鎮之以靜，自正。

名與身孰親

哀哉世俗，徇榮馳騖，竭力喪精，得失相紛，憂驚自是，勤苦不宣。

生生厚昭咎

金玉滿堂莫守、古人安此龕醜、獨以道德爲友、故能延期不朽、

名行顯患滋

位高勢重禍基、美色伐性不疑、厚味腊毒難治、如何貪人不思、

東方朔至清

外以貪污內貞、穢身滑稽隱名、不爲世累所撓、所欲不足無營、

楚子文善仕

三爲令尹，不喜。柳下降身，蒙耻不以爵祿爲已。
靜恭古惟二子。

老萊妻賢名

不願夫子相荆，相將避祿隱耕。樂道閒居採萍，
終厲高節不傾。

嗟古賢原憲

弃背膏粱朱顏，樂此屢空飢寒。形陋體逸心寬，
得志一世無患。

思親詩

奈何愁兮愁無聊，恒惻惻兮心若抽。愁奈何兮
悲思多，情鬱結兮不可化。奄失恃兮孤煢煢，內
自悼兮啼失聲。思報德兮邈已絕，感鞠育兮情
剝裂。嗟母兄兮永潛藏，想形容兮內摧傷。感陽
春兮思慈親，欲一見兮路無因。望南山兮發哀
歎，感機杖兮涕汎瀾。念疇昔兮母兄在心，逸豫
兮壽四海。忽已逝兮不可追，心窮約兮但有悲。
上堂兮窮無依，覩遺物兮心崩摧。中夜悲兮

當告誰獨收淚兮抱哀戚日遠邁兮思予心戀
所生兮淚不禁慈母沒兮誰與驕顧自憐兮心
切切訴蒼天今天不聞淚如雨兮歎青雲欲弃
憂兮尋復來痛殷殷兮不可裁

琴歌

琴賦云拊絃安歌
新聲代起歌曰

凌扶搖兮憇瀛洲要列子兮爲好仇餐沆瀣兮
帶朝霞眇翩翩兮薄天遊齊萬物兮超自得委
性命兮任去留激清響以赴會何絃歌之綢繆

和甫集

卷全

當告誰獨收淚兮抱哀戚日遠邁兮思予心戀
所生兮淚不禁慈母沒兮誰與驕顧自憐兮心
忉忉訢蒼天今天不聞淚如雨兮歎青雲欲弃
憂兮尋復來痛殷殷兮不可裁

琴歌

琴賦云拊絃安歌
新聲代起歌曰

凌扶搖兮憇瀛洲要列子兮爲好仇餐沆瀣兮
帶朝霞眇翩翩兮薄天遊齊萬物兮超自得委
性命兮任去留激清響以赴會何絃歌之綢繆

和氏集卷全
三

本傳

嵇康字叔夜，譙國鉅人也。其先姓奚，會稽上虞人，以避怨徙焉。鉅有嵇山，家于其側，因而命氏。兄喜有當世才，慝太僕宗正康，早孤，有奇才，遠邁不群，身長七尺八寸，美詞氣，有風儀，而土木形骸，不自藻飾，人以為龍章鳳姿。天質自然，恬靜寡慾，含垢匿瑕，寬簡有大量，學不師受，博覽無不該通。長好老莊，與魏宗室婚，拜中散大夫，嘗修養性服食之事，彈琴詠詩，自足於懷，以為。

神○仙○稟○之○自○然○非○積○學○所○得○至○於○導○養○得○理○則○
安○期○彭○祖○之○倫○可○及○乃○著○養○生○論○又○以○爲○君○子○
無○私○著○無○私○論○蓋○其○胸○懷○所○寄○以○高○契○難○期○每○
思○郢○質○所○與○神○交○者○惟○陳○畱○阮○籍○河○內○山○濤○預○
其○流○者○河○內○向○秀○沛○國○劉○伶○籍○兄○子○咸○琅○邪○王○
戎○遂○爲○竹○林○之○遊○世○所○謂○竹○林○七○賢○也○戎○自○言○
與○康○居○山○陽○二○十○年○未○嘗○見○其○喜○愠○之○色○康○嘗○
採○藥○游○山○澤○會○其○得○意○忽○焉○忘○反○時○有○樵○蘇○者○

登。沈。默。自。守。無。所。言。談。康。臨。去。登。曰。君。性。烈。而。才。雋。其。能。免。乎。康。又。遇。王。烈。共。八。山。烈。嘗。得。石。髓。如。飴。卽。自。服。半。餘。半。與。康。皆。凝。而。爲。石。又。於。石。室。中。見。一。卷。素。書。遽。呼。康。往。取。輒。不。復。見。烈。乃。嘆。曰。叔。夜。趣。非。常。而。輒。不。遇。命。也。其。神。心。所。感。每。遇。幽。逸。如。此。山。濤。將。去。選。官。舉。康。自。代。康。乃。與。濤。書。告。絕。書。旣。行。知。其。不。可。羈。屈。也。性。絕。巧。而。好。鍛。宅。中。有。一。柳。樹。甚。茂。乃。激。水。圍。之。每。夏。月。居。其。下。以。鍛。東。平。呂。安。服。康。高。致。每。一。相。

思輒千里命駕。康友而善之。後安爲兄所枉。訴
以事繫獄。辭相證引。遂復收康。康性慎言行。一
旦繆繼乃作幽憤詩。初康居貧。嘗與向秀共鍛
於大樹之下。以自贍給。潁川鍾會貴公子也。精
練有才辨。故往造焉。康不爲之禮。而鍛不輟。良
久會去。康謂曰。何所聞而來。何所見而去。會曰。
聞所聞而來。見所見而去。會以此憾之。及是言
於文帝曰。嵇康卧龍也。不可起。公無憂天下。顧
以康爲慮耳。因譖康欲助母邱儉。賴山濤不聽。

昔齊戮華士魯誅少正卯誠以害時亂教故聖
賢去之康安等言論放蕩非毀典謨帝王者所
不宜容宜因釁除之以淳風俗帝旣昵聽信會
遂并害之康將刑東市太學生二千人請以爲
師弗許康顧見日影索琴彈之曰昔袁孝尼嘗
從吾學廣陵散吾每靳固之廣陵散於今絕矣
時年四十海內之士莫不痛之帝尋悟而恨焉
初康嘗游平洛西暮宿華陽亭引琴而彈夜分
忽有客詣之稱是古人與康共談音律辭致清

辯。因索琴彈之。而爲廣陵散。聲調絕倫。遂以授康。仍誓不傳人。亦不言其姓字。康善談理。又能屬文。其高情遠趣。率然玄遠。撰上古以來高士爲之傳贊。欲友其人於千載也。又作太師箴。亦足以明帝王之道焉。復作聲無哀樂論。甚有條理。手紹別有傳。

鍾同叔集

鍾同叔集

卷一

鍾司徒集

魏鍾司徒集題詞

鍾士季弱冠與王輔嗣並知名其論
易無互體才性同異厥旨不殊然山
陽易註光列學宮而潁川立辨寂爾
不顯豈才地經營方期功業無暇立
言或者身族糜覆策書烟銷微言妙

義莫得而聞也志云道論二十篇係
士季文筆今不獲見其他亡軼可以
類推命婦傳善言母德宗述教訓在
齊女傳母魯季敬姜之間乃鳴鶴白
茅樞機慎密母誨至勤胡爲破蜀以
後頓忘執手之戒自取滅門夫司馬

專國眦睨魏鼎奄有西土勢必自帝
魏亡于司馬與亡于士季等亡爾使
反謀果成步騎並發縛文王父子告
廟釁鼓奠安大魏功豈在閔散以下
卽不然同爲篡臣割地而守未知誰
雌雄也時違其才傾跌須臾亂兵登

金市集 是言 二
城英雄駢死天相司馬非盡士季之
失抑覽其遺篇彬彬儒雅則猶魏文
七子餘澤矣

婁東張溥題

勅鍾司徒集目錄

賦

孔雀賦

菊花賦

又

蒲萄賦

檄

移蜀檄

奏

平蜀奏

書

與姜維書

與蔣斌書

與吳主書

記

高貴鄉公少康高祖優劣論記

傳

母張夫人傳

成侯命婦傳

論

芻堯論

附錄

本傳

鍾司走集

目錄

二

鍾司徒集目錄終

魏鍾司徒集卷全

魏鍾會士季著

明張溥西銘閱

賦

孔雀賦

有炎方之偉鳥感靈和而來儀稟麗精以挺質
生丹穴之南垂戴翠毛以表弁垂綠綦之森纚
裁修尾之翹翹若順風而揚麾五色點注華羽
參差鱗交綺錯文藻陸離丹口金輔立目素規

或舒翼軒峙奮迅洪姿或蹠足踟躕鳴嘯郁咲

菊花賦

何秋菊之可奇兮獨華茂乎凝霜提歲筵於蒼
春兮表壯觀乎金商延蔓蓊鬱緣阪被岡縹幹
綠葉青柯紅芒芳實離離暉藻煌煌微風扇動
翌曜垂光於是季秋九月九日數并置酒華堂
高會娛情百卉雕瘁芳菊始榮紛葩韡韡或黃
或青乃有毛嫵西施荆姬秦嬴妍姿妖艷一顧
傾城擢纖纖之素手雪皓腕而露形仰撫雲髻

俯弄芳榮

又

夫菊有五美焉。圓英高懸，准天極也。純黃不雜，后土色也。早植晚登，君子德也。冒霜吐穎，象勁直也。流中輕體，神仙食也。

蒲萄賦

有序

余植蒲桃於堂前，嘉而賦之。命荀勗並作美。乾衛之廣覆兮，佳陽澤之至涓。覽遐方之殊偉兮，無斯果之獨珍。託靈根於玄圃，植崑山之

金華集 卷之二
高垠綠葉芬鬱、暖若重陰翳義和秀房陸離焜
若紫英乘素波、仰承甘液之靈露、下歛豐潤於
醴泉、總衆和之淑美、體至氣於自然、珍味允備
與物無儔、清濁外暢甘旨內適、滋澤膏潤入口
散流、

檄

移蜀檄

往者漢祚衰微率土分崩生民之命幾於泯滅
太祖武皇帝神武聖哲撥亂反正拯其將墜造
我區夏高祖文皇帝應天順民受命踐阼烈祖
明皇帝奕世重光恢拓洪業然江山之外異政
殊俗率土齊民未蒙王化此三祖所以顧懷遺
恨也今主上聖德欽明紹隆前緒宰輔忠肅明
允劬勞王室布政垂惠而萬邦協和施德百蠻

而肅慎致貢、悼彼巴蜀、獨爲匪民、愍此百姓、勞役未已、是以命授六師、冀行天罰、征西雍州鎮西諸軍、五道竝進、古之行軍、以仁爲本、以義治之、王者之師、有征無戰、故虞舜舞干戚而服有苗、周武有散財發廩表閭之義、今鎮西奉辭銜命、攝統戎重、庶弘文告之訓、以濟元元之命、非欲窮武極戰、以快一朝之政、故略陳安危之要、其敬聽話言、益州先主以命世英才、興兵朔野、困躋冀徐之郊、制命紹布之手、太祖拯而濟之、

與隆大好。中更背違。棄同卽異。諸葛孔明仍規
秦川。姜伯約屢出隴右。勞動我邊境。侵擾我氏
羌。方國家多故。未遑修九伐之征也。今邊境又
清。方內無事。蓄力待時。并兵一向。而巴蜀一州
之衆。分張守備。難以禦天下之師。段谷侯和沮
傷之氣。難以敵堂堂之陣。比年以來。曾無寧歲。
征夫勤瘁。難以當子來之民。此皆諸賢所親見
也。蜀相牡見禽於秦。公孫述授首於漢。九州之
險。是非一姓。此皆諸賢所備聞也。明者見危於

無形智者窺禍於未萌。是以微子去商。長爲周
賓。陳平背項。立功於漢。豈晏安耽毒。懷祿而不
變哉。今國朝隆天覆之恩。宰輔弘寬恕之德。先
惠後誅。好生惡殺。往者吳將孫壹舉衆內附。位
爲上司。寵秩殊異。文欽唐咨爲國大害。叛主讐
賊。還爲戎首。咨困逼禽獲。欽二子還降。皆將軍
封侯。咨與聞國事。壹等窮蹙歸命。猶加盛寵。況
巴蜀賢知見機而作者哉。誠能深鑒成敗。邈然
高蹈。投跡微子之蹤。錯身陳平之軌。則福同古

人。慶流來裔。百姓士民安堵舊業。農不易。市
不回肆。去累卵之危。就永安之福。豈不美歟。若
偷安旦久。迷而不反。大兵一發。玉石皆碎。雖欲
悔之。亦無及已。其詳擇利害。自求多福。各具宣
布。咸使聞知。

奏

平蜀奏

賊姜維張翼廖化董厥等逃死遁走欲趣成都
臣趣遣司馬夏侯咸護軍胡烈等徑從劔閣出
新都大渡截其前參軍爰彰將軍句安等躡其
後參軍皇甫闓將軍王買等從涪南出衝其腹
臣據涪縣爲東西勢援維等所統步騎四五萬
人。擐甲厲兵塞川填谷數百里中首尾相繼憑
恃其衆方軌而西。臣勅咸闓等令分兵據勢廣

張羅罔。南杜走吳之道。西塞成都之路。北絕越
逸之徑。四面雲集。首尾竝進。蹊路斷絕。走伏無
地。臣又手書申喻。開示生路。群寇困逼。知命窮
數盡。解甲投戈。面縛委質。印綬萬數。資器山積。
昔舜舞千戚。有苗自服。牧野之師。商旅倒戈。有
征無戰。帝王之盛業。全國爲上。破國次之。全軍
爲上。破軍次之。用兵之令典。陛下聖德侔蹤前
代。翼輔忠明。齊軌公旦。仁育群生。義征不諱。殊
俗向化。無思不服。師不踰時。兵無血刃。萬里同

風九州共貫臣輒奉宣詔命導揚恩化復其社稷安其間伍舍其賦調弛其征役訓之德禮以移其風示之軌儀以易其俗百姓欣欣人懷逸豫。後來其蘇義無以過。

子

...

...

...

...

...

...

...

...

書

與姜維書

公侯以文武之德懷邁世之略功濟巴漢聲揚
華夏遠近莫不歸名每惟疇昔嘗同大化吳札
鄭僑能喻斯好

與蔣斌書

巴蜀賢智文武之士多矣至于足下諸葛思遠
譬諸草木吾氣類也桑梓之敬古今所敦西到
欲奉瞻尊大君公侯墓當灑埽墳塋奉祠致敬

願告其所在

與吳主書

執笏之心載在名策

記

高貴鄉公少康高祖優劣論記

三月丙辰帝宴羣臣于太極東堂與侍中荀顗
尙書崔賛袁亮鍾毓給事中中書令虞松等並
講述禮典遂言帝王優劣之差帝慕少康因問
顗等曰有夏旣衰后相殆滅少康收集夏衆復
禹之績高祖拔起隴畝驅帥豪雋芟夷秦項包
舉寓內斯二主可謂殊才異略命世大賢者也
考其功德誰宜爲先顗等對曰夫天下重器王

者天授聖德應期然後能受命創業至于階緣
前緒興復舊績造之與因難易不同少康功德
雖美猶爲中興之君與世祖同流可也至如高
祖臣等以爲優帝曰自古帝王功德言行互有
高下未必創業者皆優紹繼者咸劣也湯武高
祖雖俱受命賢聖之分所覺縣殊少康殷宗中
興之美夏啟周成守文之盛論德較實方諸漢
祖吾見其優未聞其劣顧所遇之時殊故所名
之功異耳少康生於滅亡之後降爲諸侯之隸

崎○嶇○逃○難○僅○以○身○免○能○布○其○德○而○兆○其○謀○卒○滅○
過○戈○克○復○禹○績○祀○夏○配○天○不○失○舊○物○非○至○德○弘○
仁○豈○濟○斯○勳○漢○祖○因○土○崩○之○勢○仗○一○時○之○權○專○
任○智○力○以○成○功○業○行○事○動○靜○多○違○聖○檢○爲○人○子○
則○數○危○其○親○爲○人○君○則○囚○繫○賢○相○爲○人○父○則○不○
能○衛○子○身○沒○之○後○社○稷○幾○傾○若○與○少○康○易○時○而○
處○或○未○能○復○大○禹○之○績○也○推○此○言○之○宜○高○夏○康○
而○下○漢○祖○矣○諸○卿○具○論○詳○之○翌○日○丁○巳○講○業○旣○
畢○顓○亮○等○議○曰○三○代○建○國○列○土○而○治○當○其○衰○弊○

無士崩之勢。可懷以德。難屈以力。逮至戰國。強弱相兼。去道德而任智力。故秦之弊。可以力爭。少康布德。仁者之英也。高祖任力。智者之儔也。仁智不同。二帝殊矣。詩書述殷中宗。高宗皆列大雅。少康功美。過於二宗。其爲大雅明矣。少康爲優。宜如詔旨。贊毓松等議曰。少康雖積德累仁。然上承大禹。遺澤餘慶。內有虞仍之援。外有靡艾之助。寒浞讒慝。不德于民。澆獍無親。外內棄之。以此有國。蓋有所因。至於漢祖。起自布衣。

率烏合之士。以成帝者之業。論德則少康優。課功則高祖多。語資則少康易。較時則高祖難。帝曰。諸卿論少康因資。高祖創造。誠有之矣。然未知三代之世。任德濟勳。如彼之難。秦項之際。任力成功。如此之易。且太上立德。其次立功。漢祖功高。未若少康盛德之茂也。且夫仁者必有勇。誅暴必用武。少康武烈之威。豈必降於漢祖哉。但夏書淪亡。舊文殘闕。故勳美闕而罔載。唯有伍員。粗述大略。其言復禹之績。不失舊物。祖述

聖業舊章不愆。自非大雅兼才。孰能與於此。向
令墳典具存。行事詳備。亦豈有異同之論哉。於
是羣臣咸悅服中。書令松進曰。少康之事。去世
久遠。其文昧如。是以自古及今。議論之士。莫有
言者。德美隱而不宣。陛下旣垂心遠鑒。考詳古
昔。又發德音。贊明少康之美。使顯於千載之上。
宜錄以成篇。永垂於後。帝曰。吾學不博。所聞淺
狹。懼於所論。未獲其宜。縱有可采。億則屢中。又
不足貴。無乃致笑後賢。彰吾闇昧乎。於是侍郎


鍾會退論次焉

鍾會集

卷八

記

七



傳

生母張夫人傳

夫人張氏字昌蒲太原茲氏人太傅定陵成侯之命婦也世長吏二千石夫人少喪父母克成侯家修身正行非禮不動爲上下所稱述貴妾孫氏懾嫡專家心害其賢數讒毀無所不至孫氏辨博有知巧言足以飾非成過然竟不能傷也及妊娠愈更嫉妬乃置藥食中夫人中食覺而吐之瞑眩者數日或曰何不向公言之答曰

嫡庶相害破家危國古今以爲鑒誠假如公信
我衆誰能明其事彼以心度我謂我必言固將
先我事繇彼發顧不快邪遂稱疾不見孫氏果
謂成侯曰妾欲其得男故飲以得男之藥反謂毒
之成侯曰得男藥佳事闇於食中與人非人情
也遂訊侍者具服孫氏繇是得罪出成侯問夫
人何能不言夫人言其故成侯大驚益以此賢
之黃初六年生會恩寵愈隆成侯旣出孫氏更
納正嫡賈氏

夫人性矜嚴明於教訓會雖童稚勤見規誨年
四歲授孝經七歲誦論語八歲誦詩十歲誦尚
書十一誦易十二誦春秋左氏傳國語十三誦
周禮禮記十四誦成侯易記十五使入太學問
四方奇文異訓謂會曰學猥則倦倦則怠怠吾
懼汝之意怠故以漸訓汝今可以獨學矣雅好
書籍涉歷衆書特好易老子每讀易孔子說鳴
鶴在陰勞謙君子籍用白茅不出戶庭之義每

使○會○反○覆○讀○之○曰○易○三○百○餘○爻○仲○尼○特○說○此○者○
以○謙○恭○慎○密○樞○機○之○發○行○已○至○要○榮○身○所○繇○故○
也○順○斯○術○以○往○足○爲○君○子○矣○正○始○八○年○會○爲○尚○
書○郎○夫○人○執○會○手○而○誨○之○曰○汝○弱○冠○見○叙○人○情○
不○能○不○自○足○則○損○在○其○中○矣○勉○思○其○戒○是○時○大○
將○軍○曹○爽○專○朝○政○日○縱○酒○沉○醉○會○兄○侍○中○毓○宴○
還○言○其○事○夫○人○曰○樂○則○樂○矣○然○難○久○也○居○上○不○
驕○制○節○謹○度○然○後○乃○無○危○溢○之○患○今○奢○僭○若○此○
非○長○守○富○貴○之○道○嘉○平○元○年○車○駕○朝○高○平○陵○會○

爲中書郎從行相國宣文侯始舉兵衆人恐懼而夫人自若中書令劉放侍郎衛瓘夏侯和等家皆怪問夫人一子在危難之中何能無憂答曰大將軍奢侈無度吾常疑其不安太傅義不危國必爲大將軍舉耳吾兒在帝側何憂聞且出兵無他重器其勢必不久戰果如其言一時稱明會歷機密十餘年頗豫政謀夫人謂曰昔范氏少子爲趙簡子設伐邾之計事從民悅可謂功矣然其母以爲乘僞作詐末業鄙事必不

能久其識本深遠。非近人所言。吾常樂其爲人。
汝居心正。吾知勉矣。但當修所志。以輔益時化。
不忝先人耳。常言人誰能皆體自然。但力行不
倦。抑亦其次。雖接鄙賤。必以言信。取與之間。分
畫分明。或問此無乃小乎。答曰。君子之行。皆積
小以致高大。若以小善爲無益而弗爲。此乃小
人之事耳。希通慕大者。吾所不好。會自幼少。衣
不過青紺。親營家事。自知恭儉。然見得思義。臨
財必讓。會前後賜錢帛數百萬計。悉送供公家。

之用。一無所取。年五十有九。甘露二年二月暴疾薨。比葬。天子有手詔。命大將軍高都侯厚加賜贈。喪事無巨細。一皆供給。議者以爲公侯有夫人。有世婦。有妻。有妾。所謂外命婦也。依春秋成風定姒之義。宜崇典禮。不得總稱妾名。於是稱成侯命婦殯葬之事。有取於古制禮也。

芻蕘論

國之稱富者在乎豐民非獨謂府庫盈倉廩實也且府庫盈倉廩實非上天所降皆取之於民民困國虛矣。

本傳

鍾會字士季，潁川長社人。太傅繇小子也。少敏惠，夙成。中護軍蔣濟著論，謂觀其眸子，足以知人。會年五歲，繇遣見濟，濟甚異之，曰：「非常人也。」及壯，有才數技藝，而博學精練，名理以夜續晝繇是，獲聲譽。正始中，以爲祕書郎，遷尚中書侍郎。高貴鄉公卽尊位，賜爵關內侯，毋上儉作亂。大將軍司馬景王東征，會從典知密事，衛將軍司馬文王爲大軍後繼。景王薨於許昌，文王總

統六軍、會謀謨帷幄、時中詔勅尚書傳嘏、以東
南新定、權畱衛將軍屯許昌、爲內外之援、令嘏
率諸軍還、會與嘏謀、使嘏表上、輒與衛將軍俱
發還、到雒水南屯住、於是朝廷拜文王爲大將
軍輔政、會遷黃門侍郎、封東武亭侯、邑三百戶、
甘露二年、徵諸葛誕爲司空、時會喪、寔在家、策
誕必不從命、馳白文王、文王以事已施行、不復
追改、及誕反、車駕住項、文王至壽春、會復從行、
初、吳大將全琮、孫權之婚親重臣也、琮子憚、孫

靜從子端翮諱等皆將兵來救誕。惲兄子輝儀
畱建業。與其家內爭訟。携其母將部曲數十家
渡江。自歸文王。會建策。密爲輝儀作書。使輝儀
所親信齎入城。告惲等。說吳中怒惲等不能拔
壽春。欲盡誅諸將家。故逃來歸命。惲等恐懼。遂
將所領開東城門出降。皆蒙封寵。城中錄是垂
離。壽春之破。會謀居多。親待日隆。時人謂之子
房。軍還。遷爲太僕。固辭不就。以中郎在大將軍
府。管記室事。爲腹心之任。以討諸葛誕功。進爵

陳侯屢讓不受。詔曰：「會典綜軍事，參同計策，料敵制勝，有謀謨之勲，而推寵固讓，辭指款實。前後累重，志不可奪。夫成功不處，古人所重，其聽會所執，以成其美。」遷司隸校尉。雖在外，司時政損益，當世與奪，無不綜典。嵇康等見誅，皆會謀也。文王以蜀大將姜維屢擾邊陲，料蜀國小民疲，資力單竭，欲大舉圖蜀，惟會亦以爲蜀可取。豫共籌度地形，考論事勢。景元三年冬，以會爲鎮西將軍，假節都督關中諸軍事。文王勅青徐

充豫荆揚諸州，並使作船。又令唐咨作浮海大船，外爲將伐吳者。四年秋，乃下詔使鄧艾諸葛緒各統諸軍三萬餘人，艾趣甘松，沓中，連綴維緒，趣武街橋頭，絕維歸路。會統十餘萬衆，分從斜谷，駱谷入。先命牙門將許儀在前治道。會在後行，而橋穿馬足陷。於是斬儀。儀者，許褚之子。有功王室，猶不原貸。諸軍聞之，莫不震竦。蜀令諸圍皆不得戰，退還漢樂二城。守魏興太守劉欽，趣子午谷。諸軍數道平行至漢中。蜀監軍王

含守樂城護軍蔣斌守漢城兵各五千會使護
軍荀愷前將軍李輔各統萬人愷圍漢城輔圍
樂城會徑過西出陽安口遣人祭諸葛亮之墓
使護軍胡烈等行前攻破關城得庫藏積穀姜
維自沓中還至陰平合集士衆欲赴關城未到
聞其已破退趣白水與蜀將張翼廖化等合守
劔閣拒會會移檄蜀將士吏民鄧艾追姜維到
陰平簡選精銳欲從漢德陽入江由左僮道詣
緄竹趣成都與諸葛緒共行緒以本受節度邀

姜維西行，非本詔，遂進軍前向白水與會合。會遣將軍田章等從劬閣西徑出江由，未至百里，章先破蜀伏兵三校。艾使章先登，遂長驅而前，會與緒軍向劬閣。會欲專軍勢，密白緒畏懦，不進。檻車徵還，軍悉屬會。進攻劬閣，不克，引退。蜀軍保險拒守，艾遂至緇竹大戰，斬諸葛瞻。維等聞瞻已破，率其衆東入于巴。會乃進軍至涪，遣胡烈、田續、龐會等追維。艾進軍向成都，劉禪詣艾降，遣使勅維等令降於會。維至廣漢郫縣，令

兵悉放器仗送節傳於胡烈。便從東道詣會降。會上言。會于是禁檢士衆。不得鈔略。虛已誘納。以接蜀之群司。與維情好歡甚。十二月詔曰。會所向摧弊。前無彊敵。緘制衆城。罔羅迸逸。蜀之豪帥。面縛歸命。謀無遺策。舉無廢功。凡所降誅。動以萬計。全勝獨克。有征無戰。拓平西夏。方隅清晏。其以會爲司徒。進封縣侯。增邑萬戶。封子二人亭侯。邑各千戶。會內有異志。因鄧艾承制專事。密白艾有反狀。於是詔書檻車徵艾。司馬

文王懼艾或不從命。勅會並進軍成都。監軍衛
瓘在會前行。以文王手筆。令宣喻艾軍。艾軍皆
釋仗。遂收艾入檻車。會所憚惟艾。艾旣禽。而會
尋至。獨統大衆。威震西土。自謂功名蓋世。不可
復爲人下。加猛將銳卒。皆在已手。遂謀反。欲使
姜維等皆將蜀兵出斜谷。會自將大衆隨其後。
旣至長安。令騎士從陸道。步兵從水道。順流浮
渭入河。以爲五日可到孟津。與騎會洛陽。一旦
天下可定也。會得文王書云。恐鄧艾或不就徵。

今遣中護軍賈充將步騎萬人徑入斜谷屯樂城吾自將十萬屯長安相見在近會得書驚呼所親語之曰但取鄧艾相國知我能獨辦之今來大重必覺我異矣便當速發事成可得天下不成退保蜀漢不失作劉備也我自淮南以來畫無遺策四海所共知也我欲持此安歸乎會以五年正月十五日至其明日悉請護軍郡守牙門騎督以上及蜀之故官爲太后發喪于蜀朝堂矯太后遺詔使會起兵廢文王皆班示坐

上人使下議訖書版署置更使所親信代領諸軍所請群官悉閉著益州諸曹屋中城門宮門皆閉嚴兵圍守會帳下督丘建本屬胡烈烈薦之文王會請以自隨任愛之建愍烈獨坐啓會使聽內一親兵出取飲食諸牙門隨例各內一人烈綰語親兵及疏與其子曰丘建密說消息會已作大坑白梃數千欲悉呼外兵入人賜白帟拜爲散將以次梃殺坑中諸牙門親兵亦咸說此語一夜傳相告皆徧或謂會可盡殺牙門

騎督以上。會猶豫未決。十八日日中。烈軍兵與
烈兒雷鼓出。聞諸軍兵不期。皆鼓譟出。曾無督
促之者。而爭先赴城。時方給與姜維鎧仗。白外
有匈匈聲。似矢火有頃。白兵走向城。會驚謂維
曰。兵來似欲作惡。當云何。維曰。但當擊之耳。會
遣兵悉殺所閉諸牙門郡守內人。共舉机以柱
門。兵斫門不能破。斯須。門外倚梯登城。或燒城
屋。蟻附亂進。矢下如雨。牙門郡守各緣屋出。與
其卒兵相得。姜維率會左右戰。手殺五六人。衆


既格斬維，爭赴殺會。會時年四十，將士死者數百人。初，艾爲太尉，會爲司徒，皆持節都督諸軍。如故，咸未受命而斃。會見毓以四年冬薨，會竟未知問會。兒子邕隨會與俱死。會所養兒子毅及峻、迪等下獄，當伏誅。司馬文王表天子下詔曰：「峻等祖父繇，三祖之世，極位台司，佐命立勲，饗食廟庭。父毓歷職內外，幹事有績。昔楚思子文之治，不滅鬬氏之祀。晉錄成宣之忠，用存趙氏之後。以會邕之罪而絕繇、毓之類，吾有愍然。」

峻迪兄弟特原有官爵者如故惟毅及邕息伏
法或曰毓曾密啓司馬文王言會挾術難保不
可專任故宥峻等云初文王欲遣會伐蜀西曹
屬邵悌求見曰今遣鍾會率十餘萬衆伐蜀愚
謂會單身無重任不若使餘人行文王笑曰我
豈當復不知此耶蜀爲天下作患使民不得安
息我今伐之如指掌耳而衆人皆言蜀不可伐
夫人心豫怯則智勇並竭智勇並竭而彊使之
適爲敵禽耳惟鍾會與人意同今遣會伐蜀必

可滅蜀。滅蜀之後。就如卿所慮。當何所能一辨耶。凡敗軍之將。不可以語勇。亡國之大夫。不可與圖存。心膽以破故也。若蜀以破。遺民震恐。不足與圖事。中國將士。各自思歸。不肯與同也。若作惡祇自滅族耳。卿不須憂此。慎莫使人聞也。及會白鄧艾不軌。文王將西。悌復曰。鍾會所統五六倍于鄧艾。但可勅會取艾。不足自行。文王曰。卿忘前時所言邪。而更云可不須行乎。雖爾此言不可宣也。我要自當以信義待人。但人不

當負我我豈可先人生心哉近日賈護軍問我
言頗疑鍾會不我荅言如今遣卿行寧可復疑
卿邪賈亦無以易我語也我到長安則自了矣
軍至長安會果已死咸如所策會嘗論易無互
體才性同異及會死後于會家得書二十篇名
曰道論而實刑名家也其文似會初會弱冠與
山陽王弼並知名弼好論儒道辭才逸辯注易
及老子爲尚書郎年二十餘卒

鍾司徒集終



23